

西山許真君八十五化錄卷下

西山勇悟真人施岑編

神烈化

吳君名猛 字世雲 濮陽人 仕吳為西安令 因家焉 性至孝 齟齬時 夏月手不驅蚊 懼其去己而噬親也 年四十得至人丁義神方 繼師南海太守鮑靚 復得秘法 吳黃龍中 天降白雲符授之 遂以道術大行於吳晉之間 晉武帝時 祖師從世雲傳法 世雲盡以秘要授之 永嘉末 杜弢寇蜀攻陷州縣 祖師既誅大蛇 世雲曰 蛇是蜀精 蛇死則杜強滅矣 卒如其言 嘗見暴風大發 書符擲屋上 有青烏嚙去 風即隨止 或問其故 答曰 南湖有舟遇此風 中有二道士呼天求救 故以此止之 驗之 果然 西安令干慶死已三日 世雲曰 令長數未盡 當為訟之于天 遂臥於屍傍 數日與干慶俱起 慶弟著作郎寶感其異 遂作 搜神記 行於世 嘗渡豫章江 值風濤 乏舟 世雲以所執白羽扇盡水而渡 觀者駭異 寧康二年 祖師上昇 世雲復還西安 是年十月十五日 上帝命真人周廣捧詔召世雲 遂乘白鹿車與弟子四人白晝冲昇 宅號紫雲府 今

西山許真君八十五化錄卷下

清微藏書閣

分寧縣吳仙村西平靖吳仙觀是也 政和二年五月 准誥封神烈真人

詩曰

西安縣令氣雄豪 孝道雙全法術高
青烏嚙符回暴颶 白江踏扇渡洪濤
追魂復體生干慶 躡跡誅蛇滅杜弢
立就玄功丹詔至 鹿車穩駕上天曹

正特化

蜀川陳勳 字孝舉 乃世族儒生 博學洽聞 時魏遣鍾會 鄧艾伐蜀 劉禪降 孝舉時尚少 已有出塵之志 入青城山師谷元子 求度世之法 繼聞祖師在旌陽仁政及民 走謁公庭願充書吏 祖師嘉之 付以吏職 凡表率輩流設化民俗撫字之術 裨益為多 遂引為門弟子 而託以腹心 典司經籍 守視藥鑪 祖師冲翥令執策導前焉 昔玉隆官西廡有孝舉道院 號承仙府 手植巨柏一株 其院面柏而居 政和二年五月准 誥封正特真人

詩曰

時當世亂孰崇儒 獨入青城訪道樞

嚮服祖師行善政 乞為徒弟樂奔趨
腹心可託司經籍 志力無虧視藥鑪
執策導鸞沖舉後 蒼蒼巨柏蔭厝廡
元通化

廬陵周廣 字惠常 大將軍瑜之後 少好天文音律之學 長通無為
清靜之教 嘗與同志遊蜀雲臺山 得漢天師驅剪精邪之法 救民疾
苦 聞祖師在旌陽 逕詣公庭 願備下執 祖師納之 令供侍杖屨
夙夜惟勤 遵行道法 始終不怠 還居私第 左右無違 乃就宅
西百餘步間築室以居 祖師飛舉 惠常與曾興國同驂龍車 宅號宣
紹府 唐保大中州牧周令公紹真人為祖 修營其宅 改曰宣紹府
有碑刻尚存 今曰太虛觀是也 政和二年五月 准詔封元通真人
詩曰

將家俊裔蘊才良 博學多聞喜老莊
法禮張君參正一 道求許宰謁旌陽
侍供杖屨心無怠 音聽琳琅志愈強
及至祖師昇舉日 同驂鸞馭赴仙鄉

西山許真君八十五化錄 卷下 清微藏書閣

神惠化
泗水曾亨 字興國 參之後也 少為道士 天姿明敏 博學多能
修三天法師之教 逆知來物 名山列嶽有路必通 妙訣靈符無治不
愈 神人孫登見之曰 子骨秀神清 砥礪精勤 必作霄外人矣 子
勉之 後隱居豫章之豐城 聞祖師道譽投謁門下 願侍巾几 祖師
雅器重之 神方秘訣無不秘傳 後驂龍車昇天 今豐城縣真陽觀是
其遺跡 政和二年五月 准詔封神惠真人
詩曰

骨秀神清霄外人 精勤砥礪證高真
名山列嶽皆通路 妙訣靈符普濟民
師得仙君親教育 道躋聖域際經綸
慇懃立就玄功大 駕鶴驂龍出世塵
洪施化

鉅鹿時荷 字道陽 乃黃冠上士 少修道德之教 入四明山 遇神
人教以胎息眾妙之術 用能卻寐絕粒 役使鬼神驅除邪魅 點化金
玉調濟窮苦 民受其賜聲聞遠邇 惠懷之世 聞祖師道法盛行江左

徒步踵門願充弟子 祖師納之 授以妙訣 復遺還山 教導徒眾
明帝詔赴闕 師問之 堅不願留 竟歸依棲祖師侍側 寧康二年
與陳孝舉執策導從昇天 有遺跡在豫章城 號紫蓋府 今南昌縣
廳是也 東海秣陽縣奉仙觀乃其舊隱 政和二年五月 准誥封洪施
真人

詩曰

四明昔日遇神人 授以玄機要妙因
驅役鬼神興便利 點成金玉濟飢貧
一時帝寵雖難得 千載師恩不易親
歸隱西山頻侍誨 獲驂龍馭離埃塵

精行化

豐城甘戰 字伯武 草澤布衣 以孝行見推於鄉黨 遭時亂離晦跡
草澤 喜神仙久視之術 聞祖師行孝道法 除害利物 遂造問 懇
請願備驅役 祖師異其材器 可其所請 至祖師上昇 復付以金丹
妙訣 伯武後歸豐城 布德行惠 至大建元年正月七日亭午天詔下
乃駕麟車乘雲而去 今縣中清都觀乃昔藏丹之地 其故宅號華陽

西山許真君八十五化錄卷下

清微藏書閣

亭

有飛簣觀為之奉祀 政和二年五月 准誥封精行真人

詩曰

晉室當時正亂離 隱身草澤自栖遲
身行孝道推鄉黨 性樂神仙過祖師
誅戮蟒蛇平巨害 斷除蛟蜃絕群孽
功成獨駕麟車去 壇井遺蹤在劍池

勇悟化

沛郡施岑 字太玉 鄉閭壯士 祖朔仕吳 因徙居九江赤烏縣 太
玉狀貌雄傑 勇健多力 弓劍絕倫 祖師初領徒眾誅海昏大蛇 會
鄉壯三百餘人來助力 太玉預焉 致恭懇乞願充役者 祖師納之
與甘伯武常執劍侍左右 寧康二年十一月二十八日 晨起見東方日
中有一童子 乘綵雲執素策驅蒼虬降其所居 宣玉帝詔 遂御蒼虬
乘雲而去 祖師宅東南二里間有壇曰紫玉府 即其所棲之地 西嶺
鎮江千石上有觀 今額至德 為太玉眺臺 南昌之地亦有之 皆所
以眺望水妖也 政和二年五月 准誥封勇悟真人

詩曰

撫劍從師剗鉅勳 斬蛇誅蜃獨超群
少年弧矢競威武 壯歲詞章頗廣文
身脫貔貅思晉道 手搏龍虎懶朝君
自從清蕩江西境 執策乘虬馭綵雲

潛惠化

蘭陵彭抗 字武陽 以懿戚久處師門 舉孝廉仕晉累遷尚書左丞
密修仙業 以疾辭朝 師事祖師 仍納愛女為祖師子婦 舊以彭女
為夫人 非也 故老稱為子婦是矣 祖師懷帝永嘉未化炭婦誅蛇而
彭君在許 其年已七十六七矣 豈復親匹偶乎 亦屢聞祖師夫人周
氏 今者 孝道讚 有 周女史答盱母問 一篇絕妙 疑是夫人
謙稱 故曰女史新藏經稱聖母非也 祖師念其恪誠應諸秘要纖悉付
之 速遣還朝 至穆帝永和二年致政南遊 挈家居豫章城中 再詣
門下 朝夕扣問 道業精進 宋高祖永初二年職方秉作義熙二年
八月二十四日 舉家二十六口白日昇天 郡城有宗華觀 政和二年
五月 准誥封潛惠真人
詩曰

西山許真君八十五化錄卷下

清微藏書閣

棄卻榮官要學仙 掛冠解紱便歸田
挈家匪欲叨華樾 問道惟期際本淵
遺女與師供洒掃 投身為弟愈精專
潛修玄業勲成就 舉室飛昇上九天

和靜化

南昌盱烈 字道微 以懿戚久處師門 少孤 事母以孝聞 母蓋祖
師之姊也 祖師凡二姊 盱母為之孟 遺愛錄 云 南昌盱君烈
鍾離君嘉 皆許君之甥 則盱母為祖師姊信矣 祖師為其孀居 乃
築室於宅西數十步間 俾居之 故母子日聞道妙 祖師每出則盱母
代掌其家事 仙賓隱客咸獲見之 胡天師 石灶詞 曰 吾昔嘗到
此 則客於盱母 母子並受玉皇詔部分仙眷昇天 今牆西道院乃其
舊居 號合儀府 政和二年五月 准誥封和靜真人
詩曰

母慈子孝兩相因 同志修行合至真
蕙室風和延隱客 萱堂晝永歎仙賓
時聞道妙因師教 日聽師音與道親

丹詔委令專部分 同驂仙駕離埃塵
普惠化

南昌鍾離嘉 字公陽 以懿戚久處師門 祖師仲姊之子 少喪父母
植性蘭淡 祖師嘗歎其有受道之姿 乃授之神方能拯救 付之妙
訣能役逐 祖師昇天 首以金丹之賜 是年十月十五日日中 碧霞
寶車自天來迎 公陽拜詔昇車而去 新建象牙山西源是其所也 有
觀曰丹陵 石藥白尚存 號鍾玉府 政和二年五月 准誥封普惠真
人

詩曰

孑然身似野雲翔 植性孤高智識長
役使萬神存妙訣 醫治百病得神方
雅姿可與登仙道 篤志誠宜授洞章
師賜金丹先服餌 碧霞寶輦迓公陽
沖道化

建城黃仁覽 以懿戚久處師門 字紫庭 父輔 字萬石 舉孝廉
仕至御史 紫庭神彩英秀 局量凝遠 祖師以子妻之 盡得祖師之

西山許真君八十五化錄 卷下

清微藏書閣

道 任青州從事單騎之官 留妻侍父母 然每夜輒歸 人莫得知
一夕家僮報許氏院中夜聞語笑聲 姑訊之許氏 黃郎爾 姑曰 吾
子從事數千里安得至此 許氏曰 彼已得仙道 得頃刻千里 戒在
漏語 故不敢令姑知 姑曰 若然當使我見之 是夕紫庭歸 許氏
告以故 比明 紫庭不得已出謁父母 曰 仁覽雖從宦遠鄉 夜必
潛歸膝下 仙道秘密不可泄言 恐招譴累 言訖 取竹杖化為青龍
乘之而去 故萬石亦知仙道之足慕 執弟子禮以事祖師 惟紫庭二
弟勇健不檢 日事遊畋 雖父兄奉詔飛昇而二人尚在獵所 自言受
性縱逸不堪作仙 任兄舉族飛騰 容我二弟捕鹿 紫庭歎其賦分
復折草化鹿止其妄心 遂與父母三十二口乘雲而東 從祖師仙駕昇
天 二弟後隱于西山 今方崗廟俗呼黃四郎五郎是也 瑞州高安縣
祥符觀 舊日祈仙觀是其故居 傍有許氏墜釵洲 政和二年五月
准誥封沖道真人 仁覽父輔亦求為祖師弟子 祖師以其懿戚待以客
禮 故不與十一人之數 諸弟子受法皆許傳族 壇靖各立府亭之名
其教曰大儀 曰府小儀 曰亭 乃行道法以人數多少名之
詩曰

紫庭英秀勝潘安 綵線曾牽許跨鞍
竹杖成龍通聖化 草枝變鹿戒貪殘
弟兄性異難同被 父子心齊盡得丹
天詔祖師當拔宅 舉家仙眷亦驂鸞

蘭公化

昔有異人姓蘭 名期 莫敢呼其名 稱之曰蘭公 初居于兗州曲阜
縣高平鄉九原里 其家百餘口 精修孝行 致斗中真人下降 其家
自稱孝悌王 諱弘康 字伯中 語蘭公曰 始炁為大道 於日中為
孝道 仙王元炁為至道 於月中為孝道 明王玄炁為孝道 於斗中
為孝道 悌王 夫孝至於天 日月為之明 孝至於地 萬物為之生
孝至於民 王道為之成 吾於上清以下 託化人間 示陳孝悌之教
後晉代當有真仙許遜 傳吾孝道之宗 是為眾仙之長 因付蘭公
秘旨 及金丹寶經銅符鐵券 令傳授丹陽黃堂女真譙姆 且戒之曰
將來有學者許遜 汝當以此授之 孝悌王遂將蘭公遊於郊野道傍
忽見有三古塚 指以示蘭公曰 此是汝三生解化之跡 第一塚乃
昔屍解所遺仙衣而 已 第二塚乃太陰鍊形形體已就 今當起矣

西山許真君八十五化錄卷下

清微藏書閣

第三塚藏蛻骨爾 宜移塚傍之路 勿令人物踐履也 孝悌王言訖昇
天 蘭公乃榜示行人 斷其舊路 人謂其妖妄 擅移路逕 執以詣
官 官吏拘公而執其驗 公具以前事對 官吏云必若妄言 將加誅
公曰 吾言得之孝悌王 安得妄 官吏遂引蘭公與地分對 開其
塚 其第一塚果有黃衣一領 其第二塚見一人 童顏弱質 如睡初
覺之狀 第三塚見連環骨一具 眾咸驚歎 吏乃持仙衣還獻府君
府君著衣不能勝 還與蘭公公服之 即同塚中仙人合為一體 竦身
輕舉 官吏悔謝 虔懇拜問何時再降人間 蘭公俯語之曰 我自此
或十日或百日一降 施行孝道以濟迷途 其後吳都有十五歲童 丹
陽三歲靈童 並是真仙之化身也 將弘孝道之教以接合仙之士焉
詩曰

學道還須孝行充 自然孝道感玄穹
若非一語開三塚 疇識三生守一功
聖教先期譙姆授 真仙後有許君崇
蘭公敬信天真訓 混合形神入太空
譙姆化

謹姆者 不知何許人也 其字曰嬰 嘗居金陵丹陽郡之黃堂潛修至道 忘其甲子 耆老累世見之 齒髮不衰 容貌常少 皆以謹姆呼之 謂其可為人師也 吳大帝時行丹陽市中 忽遇一男子年可十四五 扣頭再拜願為義子 謹姆告曰 汝既長成 須侍養所生 何得背其己親而事吾為母 即非其類 不合大道 於是童子跪謝而去 又經旬日復過市中 忽見孩兒年可三歲 悲啼呼叫 莫知誰氏之子 因遇謹姆執衣不捨 告云我母何來 唯願哀憫 謹姆憐其無告遂收歸撫育 漸向長成 侍供甘旨晨昏不虧 心與道合行通神明 聰慧過人搏通經教 天文地理百氏九流 窮幽極玄探微索奧 年將弱冠 姆謂之曰 我修奉正道其來已久 汝以吾撫育暫此相因 汝既無天將何以為姓氏 兒曰 昔蒙天真授以靈章 約為孝道明王 請以此為名號可乎 姆曰 既天真付授 吾何敢違 復議求婚 兒跪母前說讚曰 我非世間人 上界真高仙 今與姆作兒 乃是夙昔緣因得行孝道 度脫諸神仙 向前十五童 亦是我化身 今已道炁圓 我將返吾真 真凡自殊趣 何為議婚姻 盍於黃堂壇 傳教付至人 母既施正教 三清棲我神

西山許真君八十五化錄卷下

清微藏書閣

謹姆聞讚 驚畏異常 遂於黃堂建立壇靖 嚴奉香火 闡孝道明王之教 明王告姆修真之訣曰 每須高處玄壇 踈絕異黨 脩閑丘阜 餌服陽和 委鑒太虛 靜夷玄圃 若非無英寶帙 黃老玉書 太洞真經 豁落七元 大上隱玄之道 不可偃息 一作輕蓋於流霞之車 一作障眷盼乎文昌之台也 得此道者 九鳳齊鳴 萬靈萃止 竦身御節八景浮空 龍輿虎旂遊朔八方矣 每宜寶之 於是盡付妙訣兼授靈章 已而辭母飛騰太空 謹姆受訖 寶而秘之 積數十年人無知者 至西晉之末 許君遜 吳君猛聞姆有道 遠詣丹陽求授道法 姆知其名在圖籍 應為神仙 於是授以孝道明王之教 真仙飛舉之宗 及正一斬邪三五飛步之術 仍以蘭公所授孝悌王銅符鐵券金丹寶經一遵元戒傳付許君 仍語二君五皇元譜仙藉品秩 乃令許君以道次授吳君 二君禮謝將辭歸 許君欲每歲來禮謁姆 姆曰 止之 子勿來 吾即還帝鄉矣 乃取香茅一根南望擲之茅隨風飛去 因謂曰 子歸於所居之南數十里 認茅落處立吾祠 歲秋一至足矣 語訖忽有雲龍之駕來迎 凌空而去 今新建豐城二縣之界有黃堂觀 乃祖師倣丹陽黃堂壇所立祠 每年八月三日朝謁謹姆之所

也

詩曰

苦志修行隱市廛 不知在世幾何年
深明至道通玄妙 洞合虛元契上仙
育養童兄慈念重 監臨老姆聖功全
俟將法寶傳吳許 獨駕雲龍入碧天

金公化

地主金公 世忘其名 或云名寶 行第七 世居豫章之西山 金由以進粟補官 朴直公正鄉閭所推服 祖師與郭璞擇地至其所居 璞曰 僕相地多矣 未見有若此者 如求富貴則必有起歇 如欲棲隱大合仙格 其崗阜圓厚 位坐深邃 三峰几立 回環雲拱 內外勾鎖 無不合宜 大凡相地兼相其人 觀君表裏正與地符 乃與祖師同謁 公欣然出迎 懽如平生 璞白公曰 許君欲置一舍為修鍊之地 故同璞上謁 公曰 竊觀許君仙風道骨非塵埃中人 第恐此地不足以處君耳 君誠有意 當併置莊產以為薪水之資 許君曰 雖蒙傾蓋 然受之無名 願聞所需多寡 惟命 公曰 君子一言道合

西山許真君八十五化錄 卷下

清微藏書閣

身命猶以許人 況外物乎 老夫拙直 平生無用文券 乃取一大錢中破之 自收其半 以半授祖師 曰 以此為券 明日遂挈家居西林之廬舍 至卒老焉 玉隆官有神曰西林地主顯忠真官 即公是也 宋真宗皇帝嘗遣中使奉香燭花果於祖師 中使至溪橋 公朱衣靴幘迓之中 使不知其神也 至館問曰 適橋畔有官人相迓者誰也 今安在 左右曰 無之 中使曰 衣朱衣 狀貌肥而短者 眾咸謂無其人 翌無中使登殿致獻訖 過地主堂 視之驚曰 昨日所見者即此神也 炷香設禮敬歎其靈 歸而奏之 即有旨免本觀支移折變蓋緣於此 公之神愈久益靈 邇來報應尤彰 未易殫舉 遐邇所共知 嘉泰四年賜廟額曰昭應 嘉定三年誥封靈助侯

詩曰

靈助金侯古朴人 祖師傾蓋契如親
明君豈慮難求地 義士猶能弗顧身
便肯擘錢為設誓 何勞書券更酬緡
舉家挈往西林去 廟食吾山證土神
許大化

許大 祖師之役夫也 祖師上昇之日 適與其妻運來出市 今西嶺市聞祖師昇天 夫婦推覆米車奔馳而歸 至則仙仗已興 夫妻撫膺哀號乞從行 祖師告以善功未備 不應飛昇 乃授以地仙之術 夫妻俱隱於西山 其覆車之米在地復生 今地名翻車崗生米市即其所也 既隱不欲人識 改姓名曰午 又為所知復改曰干 夫婦各有詩留於世 干君詩曰 自從明府昇天後 出入塵寰直至今 不是藏名混世俗 賣柴沽酒貴忘心 其妻詩曰 醉舞狂歌踏落花 綠羅裙帶有丹砂 往來城市賣生藥 祇箇西山是我家 又詩曰 出入仙鄉不記春 豈知塵世有寒溫 兒家只在西山裏 除卻白雲誰到門 因干君出遊經時不歸 獨步醺壇有感而作 昨日因遊到翠微 醺壇風玲杏花稀 碧桃為我傳消息 何事人間去不歸 許大夫妻聞祖師將上昇 苦求隨行 祖師以詔使告 合從昇天人數已有定命 難循其請故預期使之出幹 雖覆車而歸 已無及矣 今人時有見之者

詩曰

祖師拔宅欲昇天 運米車翻步不前 玄詔謂何無分際 善功知是未完全

西山許真君八十五化錄 卷下

清微藏書閣

鵲鸞已返雲霄去 夫婦空悲泣涕漣 雖即未該飛舉數 西山但隱地行仙

胡詹化

胡詹二王者 旌陽縣二吏錄也 世不知其名 祖師棄官還山且久 二吏思慕盛德捨家而來 願服役終身 祖師憫其誠意 而知分不應仙 俾沒後為神 立祠於福地東南高峰作鎮水口 永享血食焉

詩曰

旌陽歸騎已駸駸 吏錄難忘德意深 辭職隨師常竭力 棄家奉道盡誠心 執鞭貴得聞言教 進履欣從聽咳音 可惜登仙無夙分 為神血食到於今

胡師化

天師姓胡 名惠超 字拔俗 不知何許人也 人莫知其年紀 唐高宗上元間來自廬山 棲於豫章西山之洪井 永淳中 幅巾布褐徒行 負杖至游帷觀 見同輩手不執板擎拳而已 美鬚眉體貌瓌偉 類四十歲人 身不甚長 然每處稠人中其首獨出其上 雖至長者止及其

肩 故時稱胡長仙 人問其年幾何 曰五十二歲 逾數十載問之亦復云然 至論晉宋已來治亂興廢纖毫不差 喜談晉司空張觀文物如其友 或云許吳二君嘗授其延生鍊化超三元九紀之道 能檄召神靈驅奮雷雨 至陶弘景校茅山華陽洞 太清經 七十卷 天師亦預焉 背縫盡朱書其姓名 覽者皆見之 又曰 吾昔到此客於盱母用是不知為何代人物也 每路逢暴骨遺骸悉埋之 地有古物寶器掘之如其言而獲 聞邪怪之物 疾之如寇讎 即務剪除之 時豫章西門有樟木精為獨足神 大興怪祟 邀人淫祀 天師一見叱罵書符禁制 即命斬伐積薪灌油以火焚燎 妖祟遂滅 以地為觀 舊名信果 今額天慶 即玄妙 昔游帷觀唐初嘗荒廢 因問主觀胡不修葺答以之材力 天師奮然而往 不逾月以木棧至高安樟木江口 距觀九十里 命棧人緊繫縛各就宿江岸 臨暮飛墨符一道 中夜烈風雷雨 比明棧已在壇下矣 凌林嶺谷所當之路林木披靡摧折 又於山下發一窖 出錢三百千為工役之須 應殿宇非人所居者 皆役鬼神為之 門外鑿三井以辟火災 俗號禁火井 故至今永無火災矣 久之 異邊顯著 天后以蒲輪召之 天師探隱巖谷 州縣搜求之急不

西山許真君八十五化錄卷下

清微藏書閣

得已而出 至都引見武成殿 后臨問仙事 天師止陳道德 帝王治化之源 后大喜 又欲留於都下 委以鍊丹之事 天師辭請還山修鍊 敕遣使齎金帛送歸 行次單父賜福曰 先生道位高尚早出塵俗如軒曆之廣成 漢朝之河上 遂能不遠千里來赴 三川日御先開望霓裳之漸遠 天津後渡瞻鶴蓋以方騰 遙睇風雲惆悵無已 儻蒙九轉之餘希遺一丸之藥 天師乃於洪崖先生古壇際鍊丹 首尾三年降詔趨召詣闕 至則館于禁中 天師辭歸 固留不許 天師一朝遁去 上聞歎恨久之 遣使齎贈甚厚 兼贈詩一篇云 高人協高志山服往山家 迢迢聞風月 去去隔煙霞 碧岫窺玄洞 玉竈鍊丹砂 今日星津上 延首望靈槎 天師歸西山居于盱母靖 觀有三清中門 祖師橫堂 皆鬼工所造 平柱眠枋疊至脊斲削之工 人弗可侔至 植立不斜堅固不朽非人可及 樑牌親題大周年號 筆力遒勁又自寫其真於後殿之壁 其居西山人皆師事之 千里之內無疫癘水旱之災 無猛鷲夭折之苦 遠近賴焉 長安三年二月十六日 命弟子於游帷觀之西北伏龍崗造墳 藏太玄真符二七星神劍靈寶策杖各一 三日而訖 天師正衣冠坐繩床 異香滿室 空中雲鶴 牆外

人馬之聲紛紛不絕 視之已解蛻矣 州具以聞賜錢帛修齋醮 謚曰洞真先生 姑蘇先生司馬禎撰牌 具載詳悉 世遠真壁將頽 有一雲水道士至以版本模寫之 儼然復前狀 越夕而壁倒 道士亦不知所往 門以政和六年奉旨重造 始撒去 今惟真版存焉

詩曰

凜然脩質氣剛雄 法術精通喜箸功
句曲校經存寶藏 旌陽授道戢妖兇
靈丹九鍊因天后 古觀重修役鬼工
德備龍崗藏劍杖 一朝解蛻脫塵籠

後跋

學仙之難 自古而然 仙何難學焉 子不觀是傳乎 西山群真皆胎仙肉質 非與人異 若云其難 則西山無昇舉之仙矣 夫難與不難之分 皆在人心自勤自怠耳 勤者不難 怠者自為難 且許真君詩傳 募化刊梓閱五七年 或張或李 左推右托 人莫肯了斯事 邇者 寶林信士宋道昇 見其蹉跎 恐一日復一日湮沒無傳 特以大道心圓成盛事 咄嗟而就 何其難哉 觀物之成否 知仙之難易

西山許真君八十五化錄卷下

清微藏書閣

無怪乎不可學

實在乎人心可否歟

故先輩云

盡物理則通道

云淳祐十禩中元日勇悟真人施岑再識

旌陽許真君飛昇之後千有餘載 迄今民攸賴焉 有禱則應 無感不通 有神陰相歟 今歲中元之夕 元明炷香於四聖堂 恍惚有神告云 翌日獻書人至 猶謂為茫然 越宿 忽承江淮隱士賈君守澄自石城來 敬瞻禮真君聖蹟 又出旌陽八十五化詩傳 拜而誦詠 乃覩西山施真人所述之詩 默契神告 感謝弗已 昇堂鳴鼓 舉白大眾 敬以所賜詩傳真于寶藏 永久其傳 上堂幾語 茲不緒錄 繼而賈君了心雲水之興 元明乃直書傳後記云 歲在丁未七月十八日 靈寶大師管內都道正知逍遙山玉隆萬壽宮孫元明頓首拜書

西山許真君八十五化錄卷下竟

天運壬辰年午月正一天師清微弟子洪鼎堅羅大英恭錄彙編

王永強複校